

**Siunnersuut uunga: Aatsitassat pillugit ingerlatallu tamatumunnga pingaarutillit pillugit Inatsisartut inatsisaat nr. 7, 7. december 2009-meersup allanngortinnissaa pillugu Inatsisartut inatsisaat (aatsitassanut ikummatissanullu inatsit)**

(Inuussutissarsiornermut Aatsitassaqaarnermullu Naalakkersuisuni ilaasortaq)

**Saqqummiussinermut allakkiq**

(Inuussutissarsiornermut Aatsitassaqaarnermullu Naalakkersuisuni ilaasortaq)

**Siullermeenera**

Matumuuna Naalakkersuisut sinnerlugit aatsitassat pillugit ingerlatallu tamatumunnga pingaarutillit pillugit Inatsisartut inatsisaata allanngortinnissaa pillugu Inatsisartut inatsisissaannut siunnersuut saqqummiutissavara.

2009-mi Namminersorlutik Oqartussat oqartussaasoqarfik aatsitassat ingerlatallu tamatumunnga pingaarutillit tiguaat. 2009-mi Namminersorlutik Oqartussat atuutsilernerisa kingornatigut Namminersorlutik Oqartussat immikkoortortani siullertut takussutissaalluartut tiguaat, aatsitassallu pillugit Inatsisartut inatsisaat 1. januar 2010-mi atuutilerpoq Inatsisartunit tamarmiusunit akuersissutigineqareermermi kingorna.

Aatsitassarsiorfik Kalaallit Nunaanni inuussutissarsiutini napatitsisut ilagissavaat, taamaattumillu ingerlatsivimmik immikkoortortap ingerlassani tamani ilisimasalinnik aqutarineqartumik sutigullu tamatigut isumannaarisumik pingaaruteqartupilussuovoq. Ukiualunnguit ingerlanerini aallartisagassatut naatsorsuutigisat suliniutit aqunneqaarnerinik tatiginninnissap pilersinnissaa kisiat pineqanngilaq, aammali Kalaallit Nunaanni aatsitassanut ikummatissanullu inatsit naapertorlugu suliniutinut atatillugu ajornartorsiutaasinnaasut pilernissaannut aarleqquteqarfiusunik isumaginnittoqarneranik kikkunnut tamanut qularnaveerineq pineqarpoq. Saniatigut suli aningaasaliisinnaasutut periarfissaasuni ingerlatseqatigiifferrujussuarni sulianik isumaginnulluartartutut aqutsisoqarfiujuarusullutalu saqqummersimaarnissarput kissaatigaarput.

Immikkoortortami sulianut tunngasunik immikkut ilisimasaqaarnerpaatut oqartussaasoqarfimmi oqartussaasutut suliarinnittarnerup isumannaarnissaa siunnersuummut tunngaviuvoq. Taamaattumik maannakkut Aatsitassaqaarnermut Ikummatissanullu Pisortaqarfiusumit avatangiisinut tunngasunik nalinginnaasumik oqartussaasutut suliarinnittarnerup avissartillugu Avatangiisinik Aqutsisoqarfimmiilernissaa siunnersuutip nassataraa.

Avatangiisinik Aqutsisoqarfiup siunissamut ilaatigut avatangiisinik sunniutaasunik naliliissutit, Aatsitassaqaarnermut Ikummatissanullu inatsit naapertorlugu suliarisanut atatillugu pisinnaaffeqartup suliarisartagassai suliaqarfialugillu nalilertassavai. Qinnuteqartut avatangiisinik naliliinerinik Avatangiisinik Aqutsisoqarfiup suliarinninnera naliliineralu Namminersorlutik Oqartussani pituttugaanngitsumik ilisimatusarnermillu tunngaveqarlutik immikkut ilisimasalittat Dansk Center for Miljø og Energimeersut aamma Pinngortitaleriffimmeersut tunngavigalugit aammalu taakkunanit siunnersorneqarnikkut pissaaq.

Aammattaaq Aatsitassaqaarnermut imaluunniit Avatangiisinut Aqutsisoqarfimmit aalajangiussat pillugit Naalakkersuisunut inatsisinik tunngaveqartumik maalaartarfissamik siunnersuutikkut atuutsitsisoqalissaaq.

VSB-mik nassuiaammut atatillugu IBA-mik isumaqatigiissusiortoqartarnissamik (*Impact Benefit Agreement*) ukiut arlerlugit aalajangersimasumik iliuseralugu piumasaqaateqartoqartarsimavoq. IBA-mut siunertaq tassaavoq suliniutip ingerlanneqarnerani tamarmi pisinnaatitaaffeqartunit aammalu illuatungerisanit ilaasunit allanit inuiaqatigiinnut tunngasumik pimoorussaqaarnissap isumannaarnissaaq. Inatsisip allanngorneratigut IBA-mi isumaqatigiissutit toqqaannartumik aatsitassanut ikummatissanullu inatsimmut ilanngunneqassapput.

Kiisalu suliniutinut annikitsunut tunngatillugu inatsimmi allannguuteqarnissaq siunnersuutaavoq. Suliniutinik annikitsunik pisinnaatitaaffeqartut oqaloqatigineri tunngavigalugit allannguut siunnersuutaavoq, tassuunakkullu suliniutit annikitsorfiit iluini aatsitassanik atuinissamut pitsaanerusumik attaveqalernissaq nassataritneqassaaq.

Suliniutinik annikitsunik akuersissutit naapertorlugit pisinnaatitaaffeqarsinnaasut kikkuuneri aamma siunnersuutikkut annertusineqarput, taamaalillutik katersugaasiviit akuerisaasut aamma pisinnaatitaaffimmik peqalersinnaalerlutik. Taamaalilluni ujaasineq atuinerlu katersugaasiviup siulersuisunit inuttut suliarineqarsinnaalerpoq, ilanngullugit siulersuisuni ilaasortanit aamma pisortaqrifusumi ilaasortanit, kiisalu katersugaasivimmi aalajangersimasumik atorfilinnit.